

# Neuzeuger Messerer - Rud

Rudenkirtag Sierning Faschingdienstag 13.2.2024



<p>Dreißg mål scho' Grüaß Gott sågt dö Messerer Rud ållweil nuh dö åltn Håsn mit da schrumpeln Lederhosn und, wia herrlich anzuschau dö sechs ållerschönstn Fraun i moa, uns bringts eppad scho' eucha Lebtåg nimma a'</p>	<p>Vül Geschlechter gibts im Land über siebzg, jå ållahand trans, two spirit oder homo demi, gyno oder pomo Haserl, Schåf und Krokodü' jeder is dös, was er wü' dö treffensde Geschlechterrolle spült da Åff, weil dös san ålle</p>
<p>Da Buagamoasta Kerbl, mei' is in Siern'g nuh hålbwegs neu möcht ganz gschwind dö nåh und ferna Siern'ger Bürger kennalerna war deswegn, tuat er beteuern ba åchtazwoanzg Weihnåchtsfeiern dass er's baldigst soweit bringt wia d'routinierte Moserin</p>	<p>Busreisn Nussbaumer, der Held führt d'Seniorn in d'weite Welt s'Restaurant wo s'Måhl gedåcht is fest zua, håt neahmd aufgmåcht ban Nåchbarbeisl gibt's nur Trinka van Spar låsst d'Herta Weckerl bringa ban Hoamfoahrn warns dann ålle gscheita da Wirt woar hundert Meter weiter</p>
<p>Da Ofnhuaba Hans, akkrat is a Jaga mit Format foahrt nåch Regensburg wegga sei' Rasse-Jågdhündin zan Decka siebn junge Welpn håt er und dö hüat't er wia a Våta jetz tuat eahm dös Gnack, oje va lauta Hundaufpassn weh</p>	<p>d'Großauer Gabi, habns vazåhlt håt an Mercedes bestøllt a ganz Joahr lang håts vawirkt ållweil den fålschn wieda 'kriagt erst zan Sechzga, hopstrala wia wanns ausgmåcht gwesn waa' is nåch unsan Vanehma da Richtige endli kemma</p>
<p>Da Eisnhuaba Heli håt, wißts eh am Dåch vierhundert K-W åber då drinn steckt a Schiefern er derf nur dö Hålfte liefern d'Freind dö habn sih Sorgn gmåcht a Fuhr Battrien ön Heli 'bråcht dass er den übrign Strom dann fürn hoåßn Summa aufhebn kann</p>	<p>d'Elfi, d'Ganglbåuerin valiert ban Ei'kaffa ihrn Ring da Fred, aufs treu sein ganz schoarf schenkt ihr glei an neuchn Roaf nåch vierzehn Tåg, ban Spar is's gwe'n håts ihrn erstn wieda gsehgn hiatz brauchts fürn zweitn Ring an Ma' den's d'Oarbat a'schåffa ka'</p>
<p>Da Hundsberger Florian is a Vereinsliebender Mann roast nåch Goisern hinein im Nam van Obstbauverein fahrt mit Freudn flott und schleini' zwoamål glei in's Radar eini mei' då war da Flori froh sunst haust da Stååt am End nuh å'</p>	<p>d'Nigl Anni, Peugeot Steyr vapåcht dö Werkstått recht teuer b'støllt sih dann, weils net bled is an någlneuchn Mercedes dass's vorn Werkståttpächter nia sih goar schauma muaß dafür håts den Noblgoarm vadeckt a Joahr lang dahoam vasteckt</p>

<p>Va Niederbrunnen da Sepp Dauner ghert a scho' za dö ältern Månna wann sei' Irmi eahm wås schåfft wird er miad glei und schlåft kimmt im Fernseh d'Christa Kummer fangts in eahm glei a' zan Brumma nimmt dös Bluat im Kreis sein Lauf und irgendwås steht sofort auf</p>	<p>s'Musiheim in Hülbern draußt is a Anblick, dass da graust måcht den Eindruck rundum åls waars a Krematorium d'Musiker und a dö -rinnen sehngs Gott sei Dank nur meist va innen hoffantli is dös koa Zeichn in Zukunft spülñ dö nur mehr Leichn</p>
<p>Unsa Göd da Wålder Murauer vasteckt sih guat hinta da Mauer koana woaß, wås er tuat wo er lebt, gehts eahm guat åls unsan Taufgöd, unvadrossn tat ma eahm gern wissn låssn dass er uns zan Dreißga rund endli å'fertign kunnt</p>	<p>Auf eah Linie schauñ toan d'Hülberner Walker Fraun zahlñ ban Båchmoar nåchn Wandern oa Rundn nå' da Andern am End dann nur mehr Aperol koana woaß, wer's saufn soll mia waarn froh wann uns wer schreibt dass mia dös kriagn wås über bleibt</p>